

SAMÞYKKT

um meðhöndlun úrgangs á Austur-Héraði.

I. KAFLI

Almenn ákvæði.

1. gr.

Austur-Hérað annast sorphirðu (sorphreinsun og sorpförgun) í sveitarfélaginu. Bæjarstjórn og heilbrigðisnefnd Austurlands, í samræmi við lög nr. 7/1998 um hollustuhætti og mengunarvarnir, hefur eftirlit með sorphirðunni og að farið sé að samþykkt þessari. Bæjarstjórn sér til þess, í samráði við heilbrigðiseftirlit og framkvæmdaaðila, að íbúar fái fræðslu um flokkun og aðra meðferð úrgangs, móttöku hans og förgun, t.d. með útgáfu leiðbeininga.

2. gr.

Austur-Hérað annast sorphreinsun á öllu íbúðarhúsnæði í sveitarfélaginu. Bæjarstjórn og heilbrigðisnefnd Austurlands hefur eftirlit með starfsemi. Bæjarstjórn er heimilt að fela öðrum framkvæmd sorphreinsunar og móttöku annars úrgangs, þ.m.t. móttöku spilliefna, brotajárns og landbúnaðarplasts. Þeir aðilar sem þetta annast skulu hafa starfsleyfi heilbrigðisnefndar eða Hollustuverndar ríkisins eftir því sem við á.

Sorpförgun skal framkvæmd undir yfirstjórn og á ábyrgð bæjarstjórnar. Bæjarstjórn er heimilt að fela öðrum að sjá um sorpförgun og samskipti við þá aðila sem við á.

3. gr.

Sérhverjum húseiganda og umráðamanni húsnæðis (húsráðanda) er skylt að nota þær aðferðir og þau flát við geymslu og meðferð úrgangs sem bæjarstjórn, í samráði við heilbrigðisnefnd, ákveður hverju sinni í samræmi við lög og reglur þar að lútandi.

Sorpgeymslur skulu vera aðgengilegar fyrir sorphreinsimenn. Þær skulu staðsettar saman ef um fjölbýlishús er að ræða. Í deiliskipulagi nýrra hverfa skal tekið tillit til sorpgeymslna við skipulagningu.

Húsráðendur skulu halda flátum hreinum og í góðu ástandi. Húsráðendur skulu hreinsa snjó frá sorpgeymslum og sorpflátum eins og þörf krefur til að halda ávallt greiðfærri leið að þeim.

4. gr.

Austur-Hérað leggur íbúðum og fyrirtækjum til sorpflát undir venjulegan heimilisúrgang þegar breytingar eru gerðar á fyrirkomulagi sorphirðu sbr. 3. gr. samþykktar þessarar.

5. gr.

Í sorpflát fyrir heimilisúrgang má aðeins setja þann úrgang sem fellur daglega til við venjulegt heimilishald, í samræmi við nánari fyrirmæli sem kunna að verða sett um flokkun úrgangs. Sorphreinsimönnum ber aðeins skylda til að losa viðurkennd sorpflát.

Oheimilt er að láta garðaúrgang, jarðvegsefni, brotajárn og annan grófan úrgang í sorpflát og gáma. Jarðvegsefni, þ.m.t. grjót, múrbrot o.þ.h. skal setja á viðurkennda losunarstaði.

Spilliefnum, lyfjum og öðrum hættulegum úrgangi skal skilað á viðurkennda móttökustaði.

Glerbrotum og öðrum oddhvössum hlutum, sem hætta er á að skaði þá sem meðhöndla úrgang eða sorpflát, skal pakkað inn eða gengið frá þeim á annan tryggilegan hátt. Gæta

skal þess að fylla ekki sorpílátin meira en svo að auðveldlega megi loka þeim. Húsráðanda er heimilt að skila umframsorpi á viðurkennda móttökustaði á vegum sveitarfélagsins.

6. gr.

Hirða heimilissorps skal fara fram reglulega eftir fyrir fram gerðri áætlun staðfestri af bæjarstjórn.

Allan úrgang sem að mati húsráðenda þarf að losa örur en gert er ráð fyrir samkvæmt áætlun þar um, skal húsráðandi sjálfur og á eigin kostnað losa í flokkunarstöð eða í viðeigandi gáma á fyrir fram ákveðnum stöðum.

7. gr.

Fyrirtæki og stofnanir skulu sjálf sjá um flutning og losun framleiðsluúrgangs. Frágangur og umgengni um sorpílát, svo og flutningur á úrgangi frá fyrirtækjum skal vera í samræmi við fyrirmæli heilbrigðisnefndar. Staðsetning sorpgáma vegna framleiðsluúrgangs skal vera í samræmi við ákvarðanir byggingarnefndar þar um, eða ákvæði deiliskipulags.

II. KAFLI

Gjaldtaka vegna meðhöndlunar úrgangs.

8. gr.

Bæjarstjórn er heimilt að innheimta sorphirðugjöld samkvæmt gjaldskrá sem sett er samkvæmt 5. mgr. 25. gr. laga um hollustuhætti og mengunarvarnir nr. 7/1998, með síðari breytingum, og að fenginni umsögn heilbrigðisnefndar. Heimilt er að haga gjaldskrárflokkum eftir þjónustustigi. Gjöld í hverjum flokki skulu vera sem næst meðal raunkostnaði við þá þjónustu sem veitt er, en þó aldrei vera hærri en sem nemur rökstuddum kostnaði við veitta þjónustu, umsýslu og eftirlit með einstökum þáttum.

Gjöld skulu lögð á hverja fasteign, stofnun eða fyrirtæki sem nýtur framangreindrar þjónustu. Austur-Hérað sér um sorphirðu neysluúrgangs sem til fellur í eldhúsum og kaffistofum fyrirtækja og stofnana, gegn greiðslu samkvæmt gjaldskrá. Bæjarstjórn skal láta birta gjaldskrána í B-deild Stjórnartíðinda.

9. gr.

Bæjarstjórn er heimilt að setja upp gjaldskrárflokka fyrir mismunandi þjónustu, með það að markmiði að draga úr sorpmagni og umfangi þess sem fer til urðunar.

III. KAFLI

Ýmis ákvæði.

10. gr.

Hafi húsráðandi kvörtun fram að færa vegna sorphirðu, skal hann koma henni á framfæri við umhverfissvið Austur-Héraðs eða framkvæmdaaðila.

Telji viðkomandi sig ekki fá fullnægjandi úrlausn, getur hann skotið málinu til heilbrigðisnefndar.

11. gr.

Óheimilt er að skilja eftir eða geyma rusl, garðaúrgang og sorp á víðavangi, götum, gangstígum eða fjörum í sveitarfélaginu. Sama á við um númerslausa bíla, vélar og önnur tæki.

12. gr.

Brjótí húsráðandi ákvæði samþykktar þessarar skal umhverfissvið Austur-Héraðs aðvara viðkomandi skriflega og óska úrbóta af hans hálfu.

Með brot á samþykkt þessari skal farið samkvæmt ákvæðum laga um hollustuhætti og mengunarvarnir nr. 7/1998, með síðari breytingum.

13. gr.

Samþykkt þessi er sett samkvæmt ákvæðum 25. gr. laga um hollustuhætti og mengunarvarnir nr. 7/1998, með síðari breytingum, og staðfestist hér með til þess að öðlast þegar gildi. Frá sama tíma fellur úr gildi samþykkt nr. 10/1993 um sorphirðu (sorphreinsun og sorpeyðingu) á Egilsstöðum.

Umhverfissráðuneytinu, 27. júní 2002.

F. h. r.

Ingimar Sigurðsson.

Sigurbjörg Sæmundsdóttir.

SAMÞYKKT

um sorphirðu í Grundarfirði.

1. gr.

Grundarfjarðarbær annast sorphirðu (sorpeyðingu og sorphreinsun) í Grundarfirði samkvæmt ákvæðum þessarar samþykktar og fer sorphirða fram undir stjórn bygginga- og skipulagsdeildar og eftirliti heilbrigðiseftirlits Vesturlands. Grundarfjarðarbær getur falið verktökum að annast innsöfnun á sorpi í Grundarfirði, flutning og förgun.

2. gr.

Verktakar sem annast sorphirðu skulu hafa til þess starfsleyfi heilbrigðisnefndar eða Hollustuverndar ríkisins, eftir því sem við á.

3. gr.

Sérhver íbúðarhafi í Grundarfirði er skyldugur að nota þær aðferðir og ílát við sorpgeymslu og hreinsun sem bæjarstjórn, í samráði við heilbrigðisnefnd ákveður.

4. gr.

Sorpgeymslur skulu vera aðgengilegar fyrir sorphirðumenn og skulu húsráðendur hreinsa snjó frá sorpgeymslum á vetrum og halda greiðfærri leið að þeim, svo unnt sé að annast hreinsun.

5. gr.

Grundarfjarðarbæ leggur til sorphilát fyrir heimilissorp til einstaklinga.

6. gr.

Í almenn sorphilát við heimili í þéttbýli og dreifbýli má aðeins setja neysluúrgang, þ.e. venjulegt heimilissorp í samræmi við nánari fyrirsmæli sem kunna að verða sett um flokkun úrgangs, sbr. 3. gr. Ekki má setja í þau mold, mól, grjót, byggingaúrgang, garðaúrgang o.þ.h. Spilliefni og annar hættulegur úrgangur má ekki fara í sorphilát né heldur lyf.